

Piet,

Wie de Waterratte in 1980 obbenuujts woorte opgerich moos 't toenmalig besjtuur natuurlijk waal good veur d'r daag kômme.

En dat dooge die: d'r ièsjte Prins van de nuuj Waterratte waor d'r Piet Vleeg.

Prins Piet d'r Ièsjte gông die kar mit trekke en ze hauwe geine baetere kinne vinge.

Ongevaer d'r bekindste, of môtte veer zegke d'r beruchste man oet Sjin.

Bekint es sinterklaos, van 't toneel, d'r Proemehook en neum mer op.

Want dat waor d'r Piet: vraog 'm en hae waor dao.

Ich weit zeker dat alle luuj hie dich van vesjillende kante kinne, mèh woo 't kôs probeerdeste 't mit humor te doon.

Mit de rippetiesjes veur 't optrae van de Oud Prinse veur de Galazitting of 't Rattine waor 't ummer zoa dat allein al dien versjiening al op de lachsjiere van de luuj wirrekde.

Vannal höbbe veer gerippeteerd, soms gônge veer sjneuzele erg wied mit oze humor en dan waosj doe innins d'r versjtendigste van ôs allemaol.

“Jônge, dat kin deer neet make” reepste dan en dan woort dat auch neet gedaon. En dao tössjedurch diene onmiskinbare, bulderende sjaterlach...

Binne de Waterratte waosjte, behalve d'r ièsjte Prins, auch besjtuurslid, vertegenwoordiger van de Oud Prinse in 't dageliks besjtuur, posbode, ballônne-meister, d'r reigelaer van 't ziekebezoek, en neum mer op.

't Leukste waor 't ummer nao de rippetiesjes en 't opboewe, bie e pötje beer.

Sjterke verhaole euver “*envelöpsjes*” en tanzmarieches woorte veur d'r zoaväölste kier vertéld en 's sjoanste waor: doe waosj euveral bie gewaes, want doe waorsj d'r oudste.

De ouwer garde wèt d'r slogan nog: *bel 1211, dan geit 't vanzelf*.

Op e gegaeve moment zagste: “*jonge, 't kint neet miè, doot 't mer zonger mich*”. Dat gông natuurlik neet, v'r höbbe dich toen regisseur gemak en dat doogste mit vööl inzét.

Mèh auch dat woort ummer lestiger.

Da reepste wir: “*jonge 't geit neet miè...*”

Mèh ein dink leetste dich noats ontnomme: dat waor 't ontgreune van d'r nuujste Oud Prins bie de Opa's. Dan kôte innins waal e kwarteer sjtaon mit e deenblad mit ein botteram mit sjtinkkiès, e Élske en eine hauve liter beer. Alle 25 de Oud Prinse höbste tössche gehad.

En mer lache es dae nuuje dao sjtong te knauwele op dae druège kiès en sjtong te granke nao dae pot beer. Mèh doe waosj resoluut: “*ièsj opaete, dan pas drinke*”

De pien vergootste dan effe, weitende datste dao later sjpiet van hauws.

Hièl déks hauste 't dreuver daste, es oudste, auch 't ièsjte zos vetrékke. Veur de kloaterie goofste dan al instruksies euver wat v'r môste doon.

Noats höbbe veer gedach dat 't zoa sjnel zoa wied zou kômme.

Doe waosj toch eine van ôs, eine koajông, waal al get auwer mèh toch eine van ôs.

Mèh ondanks 't verdreet dat v'r höbbe zunt veer toch bliej dat dich eine echte lange lijdenswaeg besjpaard is gebleve.

Piet, doe bis zoa mit ôs verbonge, v'r zulle dich noats vergaete.

Piet, wooste waosj waor 't gezellig.

Veer wunsche 't Tiny en de anger familie hiel vööl sjterkte.

Piet, rös zach, eine sjtille alaaf ....